

# চোখের চাতক

কাজী নজরুল ইসলাম

BANGLADARSHAN.COM

খাস্বাজ-পিলু-দাদরা

আমার           কোন্ কূলে আজ ভিড়ল তরী  
                      এ কোন্ সোনার গাঁয়।  
আমার           ভাটির তরী আবার কেন  
                      উজান যেতে চায়॥  
আমার           দুঃখেরে কাণ্ডারি করি  
আমি             ভাসিয়েছিলাম ভাঙা তরী,  
তুমি             ডাক দিলে কে স্বপন-পরী  
                      নয়ন-ইশারায়॥  
আমার           নিবিয়ে দিয়ে ঘরের বাতি  
                      ডেকেছিল ঝড়ের রাতি,  
তুমি             কে এলে মোর সুরের সাথী  
                      গানের কিনারায়॥  
ওগো            সোনার দেশের সোনার মেয়ে,  
তুমি             হবে কি মোর তরীর নেয়ে,  
এবার           ভাঙা তরী চলো বেয়ে  
                      রাঙা অলকায়॥

BANGLADARSHAN.COM

কাঁদিতে এসেছি      আপনারে লয়ে  
 কাঁদাতে আসিনি      হে প্রিয় তোমাতে।  
 এ মম আঁখি-জল      আমারি নয়নের  
 ঝরিবে না এ জল      তোমার দুয়ারে ॥

ভালো যদি বাসি      একাকী বাসব,  
 বিরহ-পাথারে      একাকী ভাসিব।  
 কভু যদি ভুলে      আসি তব কূলে,  
 চমকি চলিয়া      যাব দূর-পারে ॥

কাঁটার বনে মোর      ক্ষণিকের তরে  
 ফুটেছে রাঙা ফুল      শুধু লীলা-ভরে।

মালা হয়ে কবে      দুলিবে গলে কার  
 জাগিবে একাকী      লয়ে স্মৃতি কাঁটার।  
 কেহ জানিবে না      শুকাল কে কোথা,  
 কার ফুলে কারে      সাজালে দেবতা।  
 নিশীথ-অশ্রু মোর      যাইবে শুকায়ে  
 তব সুখ-দিনে      হাসির মাঝারে ॥

৩

খাস্বাজ-দাদরা

ছাড়িতে পরান নাহি চায়

তবু যেতে হবে, হয়!

মলয়া মিনতি করে

তবু কুসুম শুকায় ॥

রবে না এ মধু-রাতি

জানি তবু মালা গাঁথি,

মালা চলিতে দলিয়া যাবে

তবু চরণে জড়ায় ॥

যে-কাঁটার জ্বালা সয়ে

ফোটে ব্যথা ফুল হয়ে,

আমি কাঁদিব সে কাঁটা লয়ে

নিশীথ-বেলায়।

তুমি রবে যবে পরবাসে

আমি দূর নীলাকাশে

জাগিব তোমারি আশে

নূতন তারায় ॥

BANGLADARSHAN.COM

## 8

পূরবী-একতালা

কে তুমি দূরের সাথে

এলে ফুল ঝরার বেলায়।

বিদায়ের বংশী বাজে

ভাঙা মোর প্রাণের মেলায়॥

গোধূলির মায়ায় ভুলে

এলে হয় সন্ধ্যা-কূলে,

দীপহীন মোর দেউলে

এলে কোন্ আলোর খেলায়॥

সেদিনো প্রভাতে মোর

বেজেছে আশাবরী,

পূরবীর কান্না শুনি

আজি মোর শূন্য ভরি।

অবেলায় কুঞ্জবীথি

এলে মোর শেষ অতিথি,

ঝরা ফুল শেষের গীতি

দিনু দান তোমার গলায়॥

BANGLADARSHAN.COM



মিয়া কি মল্লার-কাওয়ালি

আজি এ শ্রাবণ-নিশি  
গুরু দেয়া-গরজন  
শনশন কাঁদে বায়ু  
কাটে কেমনে।  
কাঁপে হিয়া ঘনঘন  
নীপ-কাননে॥

অন্ধ নিশীথ, মন  
অন্ধ নয়ন ঝরে  
ভাঙিয়া দুয়ার মম  
শ্বসিছে বাহির ঘর  
খোঁজে কারে আঁধারে,  
শাওন-বারিধারে।  
এস এস প্রিয়তম,  
ভেজা পবনে॥

কার চোখে এত জল  
সহিতে না পারি কাঁদে  
ঝরে দিক প্লাবিয়া,  
‘চোখ গেল’ পাপিয়া।

কাহার কাজল-আঁখি  
ঝুরেছিল একা রাতে  
আজি এ বাদল-ঝড়ে  
বিজলি খুঁজিছে তারে  
চাহি মোর নয়নে  
কবে কোন্ শাওনে,  
সেই আঁখি মনে পড়ে,  
নভ-আঙনে॥

BANGLADARSHAN.COM

## ৬

ভৈরবী-আশাবরী-আন্ধা কাওয়ালি

আজি	বাদল ঝরে	মোর	একেলা ঘরে।
হায়	কী মনে পড়ে	মন	এমন করে॥
হায়	এমন দিনে	কে	নীড়হারা পাখি
যাও	কাঁদিয়া কোথায়	কোন্	সাথীরে ডাকি।
তোর	ভেঙেছে পাখা	কোন্	আকুল ঝড়ে॥
আয়	ঝড়ের পাখি	আয়	এ একা বৃকে,
আয়	দিব রে আশয়	মোর	গহন-দুখে।
আয়	রচিব কুলায়	আজ	নূতন করে॥
এই	ঝড়ের রাতি	নাই	সাথের সাথী,
মেঘ-	মেদুর-গগন	বায়	নিবেছে বাতি।
মোর	এ ভীকু প্রণয়	হায়	কাঁপিয়া মরে॥
এই	বাদল-ঝড়ে	হায়	পথিক-কবি
ঐ	পথের পরে	আর	কতকাল রবি,
ফুল	দলিবি কত	হায়	অভিমান-ভরে॥

BANGLADARSHAN.COM

# ৭

ভৈরবী-গজল-দাদরা

মোর ঘুমঘোরে এলে মনোহর  
নমো নম, নমো নম, নমো নম।  
শ্রাবণ-মেঘে নাচে নটবর  
ঝামঝাম, রমঝাম, ঝামঝাম॥

শিয়রে বসি চুপি চুপি চুমিলে নয়ন,  
মোর বিকশিল আবেশে তনু  
নীপ-সম, নিরুপম, মনোরম॥

মোর ফুলবনে ছিল যত ফুল  
ভরি ডালি দিনু ঢালি, দেবতা মোর  
হায় নিলে না সে ফুল, ছি ছি বেভুল,

নিলে তুলি খোঁপা খুলি কুসুম-ডোর॥  
স্বপনে কী যে কয়েছি তাই গিয়াছ চলি,  
জাগিয়া কেঁদে ডাকি দেবতায়-  
প্রিয়তম প্রিয়তম প্রিয়তম॥

BANGLADARSHAN.COM

৮

মান্দ-কাহারবা

কেউ ভোলে না কেউ ভোলে  
অতীত দিনের স্মৃতি।

কেউ দুখ লয়ে কাঁদে,  
কেউ ভুলিতে গায় গীতি॥

কেউ শীতল জলদে  
হেরে অশনির জ্বালা,

কেউ মঞ্জুরিয়া তোলে  
তার শুষ্ক কুঞ্জ-বীথি॥

হেরে কমল-মৃগালে  
কেউ কাঁটা কেহ কমল।

কেউ ফুল দলি চলে  
কেউ মালা গাঁথে নিতি॥

কেউ জ্বালে না আর আলো  
তার চির-দুখের রাতে,

কেউ দ্বার খুলি জাগে  
চায় নব চাঁদের তিথি॥

BANGLADARSHAN.COM

ভৈরবী-দাদরা

যাও যাও তুমি ফিরে  
এই মুছিনু আঁখি  
কে বাঁধিবে তোমারে  
হায় বনের পাখি॥

মোর এত প্রেম আশা  
মোর এত ভালোবাসা  
আজ সকলি দুরাশা  
আর কি দিয়ে রাখি॥

এই অভিমান-জ্বালা  
মোর একেলারি কালা,  
ম্লান মিলনেরি মালা  
দাও ধূলাতে ঢাকি॥

তোমার বেঁধেছিল নয়ন  
শুধু এ রূপের জালে,  
তাই দুদিন কাঁদিয়া  
হায় সে বাঁধন ছাড়ালে।

মোর বাঁধিয়াছে হিয়া  
তায় ছাড়াব কি দিয়া,  
সখা হিয়া তো নয়ন নহে  
সে ছাড়ে না কাঁদিয়া  
দুদিন কাঁদিয়া।

আজ যে ফুল প্রভাতে  
হায় ফুটিল শাখাতে,  
তায় দেখিল না রাতে  
সে ঝরিল না কি॥

হায় রে কবি প্রবাসী  
নাই হেথা সুখ-হাসি,  
ফুল বারে হলে বাসি  
রয় কাঁটার ফাঁকি ॥

BANGLADARSHAN.COM

পিলু-কাহারবা

ফাগুন-রাতের	ফুলের নেশায়
আগুন-জ্বালায়	জ্বলিতে আসে।
যে-দীপশিখায়	পুড়িয়া মরে
পতঙ্গ ঘোরে	তাহারি পাশে॥
অথই দুখের	পাথার-জলে
সুখের রাঙা	কমল দোলে,
কূলের পথিক	হারায় দিশা
দিবস নিশা	তাহারি বাসে॥
সুখের আশায়	মেশায় ওরা
বুকের সুধায়	চোখের সলিল।
মণির মোহে	জীবন-দহে
বিষের ফণির	গরল-শ্বাসে॥
বুকের পিয়ায়	পেয়ে হিয়ায়
কাঁদে পথের	পিয়ার লাগি,
নিতুই নতুন	স্বরগ মাগি
নিতুই নয়ন-	জলে ভাসে॥

BANGLADARSHAN.COM

ভৈরবী-দাদ্রা

নিশীথ-স্বপন তোর

ভুলে যা এ নিশি-শেষে।

বাদল-অবসানে

আকাশ উঠেছে হেসে॥

চখার পাশে আসে

বিরহ-রাতের চখী!

আঁধার লুকাল ঐ

দূর বনে এলোকেশে॥

শরম-রাঙা গালে

জাগিল কুমারী উষা,

তরণ অরণ ঐ

এস রাঙা বর-বেশে॥

বাগেশী-কাওয়ালি

ঘোর তিমির ছাইল

রবি শশী গ্রহ তারা।

কাঁপে তরাসে ভীতা ধরণী

অসীম আঁধারে হারা ॥

প্রলয়েশ মহাকাল

এলায়েছে জটাজাল,

নাচিছে ঝড়ের বেগে

সুরধুনী-জলধারা ॥

চমকি চমকি ওঠে

চপলা চপল-ফণা,

লুকাইল শিশুশশী,

মুরছিতা দিগঙ্গনা।

চাতকী চাতক-বুকে

বিভল কাঁদিয়া সারা ॥

দারুণ পিপাসায়	মায়া-মরীচিকায়
চাহিতে এলি জল	বনের হরিণী।
দন্ধ মরুতল	কে তোরে দেবে জল
ঝরিবে আঁখি-নীর	তোরি নিশিদিনই॥
নিবায়ে গৃহ-দীপ	আপন নিশাসে
আলেয়ার পিছে	এলি সুখ-আশে,
সে সুখ অবসান	সুমুখেতে শ্মশান
পিছনে অন্ধকার	চির-নিশীথিনী॥
কেন তুই বনফুল	বিলাস-কাননে
করিয়া পথ ভুল	এলি অকারণে।
ছিঁড়ে সাঁঝে তোরে	মালা গাঁথি ভোরে
দলিল বিলাসী	পথ-ধূলি সনে॥
সন্ধ্যা-গোধূলির	রাঙা রূপে ভুলে
আসিলি এ কোথায়	তমসার কূলে।
শ্রাবণ-মেঘ হয়	ভাবিয়া কুয়াশায়
হারালি পথ তোর	রে হতভাগিনী॥

খান্জাজ-দেশ-দাদ্ৰা

এত কথা কি গো কহিতে জানে

চঞ্চল ঐ আঁখি।

নীৰব ভাষায় কি যে কয়ে যায়

মনের বনের পাখি—

চঞ্চল ঐ আঁখি॥

মুদিত কমলে ভ্রমরেরি প্রায়

বন্দি হইয়া কাঁদিয়া বেড়ায়,

চাহিয়া চাহিয়া মিনতি জানায়

সুনীল আকাশে ডাকি—

চঞ্চল ঐ আঁখি॥

বুঝিতে পারি না ও-আঁখির ভাষা

জলে ডুবে তবু মেটে না পিয়াসা,

আদর সোহাগ প্রেম ভালোবাসা

অভিমান মাখামাখি॥

মানস-সায়রে মরালেরি প্রায়

গহন সলিলে ভেসে ভেসে চায়।

আমার হিয়ার নিভৃত ব্যথায়

সাধ যায় ধরে রাখি।

চঞ্চল ঐ আঁখি॥

(শুদ্ধ) সারং—একতাল্লা

মন কেন উদাসে।

(এই) ফাগুন-বাতাসে॥

যাহারে না পাইনু কভু এ জীবনে,

সে কেন গো কাঁদাতে আসে নিতি স্মরণে।

কুসুমের গন্ধে গো

তারি সুবাস ভাসে॥

কেন এ সমীরে

সে আসে ফিরে ফিরে,

নয়ন-নদী তীরে

কেন জল উছাসে॥

BANGLADARSHAN.COM

## ১৬

ভাটিয়ালি-কাহারবা

আমার গহীন জলের নদী  
আমি তোমার জলে রইলাম ভেসে জনম অবধি॥  
তোমার বানে ভেসে গেল আমার বাঁধা ঘর  
চরে এসে বসলাম রে ভাই ভাসালে সে চর।  
এখন সব হারিয়ে তোমার জলে রে  
আমি ভাসি নিরবধি॥

আমার ঘর ভাঙিলে ঘর পাব ভাই  
ভাঙলে কেন মন,  
হারালে আর পাওয়া না যায়  
মনের রতন।

জোয়ারে মন ফেরে না আর রে  
(ও সে) ভাটিতে হারায় যদি॥

তুমি ভাঙে যখন কূল রে নদী  
ভাঙে একই ধার,  
আর মন যখন ভাঙে রে নদী  
দুই কূল ভাঙে তার।  
চর পড়ে না মনের কূলে রে  
একবার সে ভাঙে যদি॥

BANGLADARSHAN.COM

ভাটিয়ালি-কার্ফা

তোমার কূলে তুলে বন্ধু  
আমি নামলাম জলে।

আমি কাঁটা হয়ে রই নাই বন্ধু  
তোমার পথের তলে ॥

আমি তোমায় ফুল দিয়েছি কন্যা  
তোমার বন্ধুর লাগি

যদি আমার শ্বাসে শুকায় সে ফুল  
তাই হলাম বিবাগী।

তুমি বুকের তলায় আছ আমার গো  
পরে শুকাইনিকো গলে ॥

BANGLADARSHAN.COM

যে দেশ তোমার ঘর রে বন্ধু  
সে দেশ হতে এসে  
আমার দুখের তরী দিছি ছেড়ে

চলতেছে সে ভেসে,

এখন যে পথে নাই তুমি বন্ধু গো

তরী সেই পথে মোর চলে ॥

আমার 'সাম্পান' যাত্রী না লয়

ভাঙা আমার তরী।

আমি আপনারে লয়ে রে ভাই

এপার ওপার করি॥

আমায় দেউলিয়া করেছে যে ভাই রে নদীর জল

আমি ডুবে দেখতে এসেছি ভাই সেই জলেরি তল।

আমি ভাসতে আসি, আসিনিকো কামাতে ভাই কড়ি॥

আমি এই জলেরি আয়নাতে ভাই দেখেছিলাম তায়

এখন আয়না আছে পড়ে রে ভাই

আয়নার মানুষ নাই।

চোখের জলে নদীর জলে রে

আমি তারেই খুঁজে মরি॥

আমি তারির আশায় 'সাম্পান' লয়ে ঘাটে বসে থাকি,

আমার তারির নাম ভাই জপমালা, তারেই কেঁদে ডাকি।

আমার নয়ন-তারা লইয়া গেছে রে

নয়ন নদীর জলে ভরি॥

ঐ নদীর জলও শুকায় রে ভাই, সে জল আসে ফিরে,

আর মানুষ গেলে ফিরে না কি দিলে মাথার কিরে।

আমি ভালোবেসে গেলাম ভেসে গো

আমি হলাম দেশান্তরী॥

ভাটিয়ালি-কার্ফা

ওরে মাঝি ভাই!

তুই কি দুখ পেয়ে কুল হারালি  
অকুল দরিয়ায়॥

তোর ঘরের রশি ছিঁড়ে রে গেল-

ঘাটের কড়ি নাই,

তুই মাঝি-দরিয়ায় ভেসে চলিস  
ভাসিয়ে তরী তাই।

ও ভাই দরিয়ায় আসে জোয়ার ভাটি রে

তোর ঐ চক্ষের পানি চাই॥

তোর চোখের জল ভাই ছাপাতে চাস

নদীর জলে এসে,

শেষে নদীই এল চক্ষের রে তোর  
তুই চলিলি ভেসে।

তুই কলস দেখে নামলি জলে রে

এখন ডুবে দেখিস কলস নাই॥

তুই কূলে যাহার কুল না পেলি,

তারে অগাধ জলে

মিছে খুঁজে মরিস ওরে পাগল

তরী বাওয়ার ছলে।

ও ভাই দুধারে এর চোরা বালু রে

তোর হেথায় মনের মানুষ নাই॥

## কীর্তন

কেন প্রাণ ওঠে কাঁদিয়া  
কাঁদিয়া কাঁদিয়া কাঁদিয়া গো।

আমি যত ভুলি ভুলি করি  
তত আঁকড়িয়া ধরি  
তত মরি সাধিয়া  
সাধিয়া সাধিয়া সাধিয়া গো॥

শ্যামের সে রূপ ভোলা কি যায়  
নিখিল শ্যামল যার শোভায়।  
আকাশ সাগরে বনে কান্তারে  
লতায় পাতায় সে রূপ ভায়।

আমার বঁধুর রূপের ছায়া বুকে ধরি  
আকাশ-আরশি নীল গো,  
বহে ভুবন প্লাবিয়া কালারে ভাবিয়া  
কালো সাগর-সলিল গো॥

আমার শ্যামেরে কাজল পরাইতে মেঘ  
বুরে বুরে ঘুরে গগনে।  
আমার শ্যামের মুকুট-চূড়া হয়ে শিখী  
নেচে ফেরে বন-ভবনে।

সখি গো—

সখি নিখিল তারে ধৈয়ায় গো।  
এই রাধিকার পারা কোটি শশী তারা  
তার নীল বুকে লুটায় গো।

যদি ফুল হয়ে ফুটি তরু-শাখে  
সে যে পল্লব হয়ে ঘিরে থাকে।  
যদি একাকিনী চলি বনতলে  
সে যে ছায়া হয়ে পিছে পিছে চলে।

যদি একা ঘরে মোর দীপ জ্বালি  
আসে আঁধারের রূপে বনমালি।

সখি গো—

আমার কলঙ্কী চাঁদ।

তার কলঙ্ক চেয়ে জ্যোৎস্না বেশি,  
কলঙ্ক তার দেখে কে।

লোকে আমার চাঁদে কলঙ্কী কয়  
জ্যোৎস্না তাহারি মেখে।

আমি তারির লাগি

কুমুদিনী হয়ে জলে ডুবে রই তারির লাগি

আমি চকোরিণী হয়ে নিশীথ জাগি তারি লাগি।

আমার প্রাণের সাগরে জোয়ার জাগে চাঁদের লাগি।

রাতে রবির কিরণ শরণ মাগে চাঁদের লাগি।

আমার কলঙ্কী চাঁদ।

আমি য়েদিকে তাকাই হেরি ও-রূপ কেবল,  
সে যে আমারি মাঝারে রহে করি নানা ছল।

সে যে বেণী হয়ে দুলে পিঠে চপল চতুর।

সে যে আঁখির তারায় হাসে কপট নিষ্ঠুর।

সখি গো—

সখি আঁখি মোর বিবাদী হলো

কালো রূপে সেও ছলে।

আমার চোখে জল বিবাদী হলো

সেও কালার রূপে গলে।

আমার বুকের কথা চোখে এল

চোখের জল সই সেও কালো।

সখি লো মোর মরণ ভালো!

সে যে আঁখিপাতা হয়ে থাকে ঘিরিয়া আঁখি

বনে বনে ডাকে তারি আঁখি কোয়েলা পাখি।

কাঁদে ফাল্গুনে গুনগুন ফুল-ভোমরা,

বন— হরিণীর চোখে তারি কাজল পরা।

BANGLADARSHAN.COM

তারে কেমনে ভুলিব।

বল্‌ সখি তারে কেমনে ভুলিব।

আমার অঙ্গ জড়িয়ে দুলে সে রঞ্জে

শাড়ি সে নীলাম্বরী গো।

আমি কুল ছাড়িয়াছি, আজ দেখি সখি

দুকুল লইয়া মরি গো।

আমার বসন-ভূষণ তারির সখা

কেমনে তায় ভুলিব।

থাকে কবরী-বন্ধে কালো ডোর হয়ে

কাল্‌ফণি কালো কেশে গো।

থাকে কপালের টিপে, চোখের কাজলে,

কপালের তিলে মিশে গো।

আমার একূল ওকূল দুকূল গেল।

আমার কূলে সেই পড়িল কালি

সেও কালার রূপে এল।

আমার কপালের কলঙ্ক-তিলক

সেও কালার রূপে এল।

রাখি কি দিয়া মন বাঁধিয়া,

আমার সকলি ভাসিল সখি

কালো যমুনারি জলে

সকলি ভাসিল—

রাখি কি দিয়া মন বাঁধিয়া

বাঁধিয়া বাঁধিয়া বাঁধিয়া গো॥

BANGLADARSHAN.COM

দেশ-পিলু-দাদরা

আঁধার রাতে কে গো একেলা।

নয়ন-সলিলে ভাসালে ভেলা ॥

কাঁদিয়া কারে খোঁজো ওপারে

আজো যে তোমার প্রভাতবেলা ॥

কি দুখে আজি যোগিনী সাজি

আপনার লয়ে এ হেলা-ফেলা ॥

সোনার কাঁকন ও দুটি করে

হেরো গো জড়িয়ে মিনতি করে।

খুলিয়া ধূলায় ফেলো না গো তায়

সাধিছে নূপুর চরণ ধরে।

হেরো গো তীরে কাঁদিয়া ফিরে

আজিও রূপের রঙের মেলা ॥

ভাটিয়ালি-কার্ফা

কি হবে লাল পাল তুলে ভাই  
‘সাম্পানের’ উপর।

তোর পালে যত লাগবে হাওয়া রে  
ও ভাই ঘর হবে তোর ততই পর॥

তোর কি দুঃখ হয় ভুলতে চাস ভাই,  
ছেঁড়া পাল রাঙিয়ে,  
এবার পরান ভরে কেঁদে নে তুই  
অগাধ জলে নেয়ে।  
তোর কাঁদনে উঠে আসুক রে  
ঐ নদীর থেকে বালুর চর॥

তুই কিসের আশায় দিবি রে ভাই  
কূলের পানে পাড়ি,  
তোর দীয়া সেথা না জ্বলে ভাই  
আঁধার যে ঘর-বাড়ি।

তুই জীবন-কূলে পেলিনে তায় রে  
এবার মরণ-জলে তালাশ কর॥

২৩

সিন্ধু-ভৈরবী-পাঞ্জাবি ঠেকা

ভাঙা মন আর জোড়া নাহি চায়।  
ঝরা ফুল আর ফেরে না শাখায়॥

শীতের হাওয়ায় তুষার হয়ে  
গলি খর-তাপে বারি যায় বয়ে,  
গলে নাকো আর হৃদয়-তুষার  
উষ্ণ ছোঁওয়ায়॥

গাঁথি ফুলমালা নাহি দিয়া গলে  
শুকালে নিঠুর তব মুঠি-তলে,  
হাসিবে না সে ফুল শত আঁখি-জলে  
আর সে শোভায়॥

BANGLADARSHAN.COM

স্রোতের সলিলে  
যে বাঁধ বাঁধিলে  
ভাঙিয়া সে বাঁধ  
তোমারে ভাসায়॥

ছায়নট-কেদারা-একতালা

আমার দুখের বন্ধু, তোমার কাছে  
চাইনি তো এ সুখ।  
আমি জানিনি তো বুকে পেয়েও  
কাঁদবে এমন বুক॥

আমার শাখায় যবে ফোটেনি ফুল  
আমি চেয়েছি পথ আশায় আকুল,  
আজ ফোটা ফুলে কাঁদে কেন  
কুসুম ঝরার দুখ॥

প্রিয়, মিলন-আশায় ছিনু সুখে  
ছিল যবে দূর।

আজ কাছে পেয়ে পরান কাঁদে  
বিদায়-ভয়াতুর।

এ যে অমৃতে গরল মিশা  
প্রাণে কেবলি বাড়িছে তৃষা,  
আমার স্বর্গে কেন মলিন ধরার  
বেদন জাগরুক॥

আমি কি সুখে লো গৃহে রবো।  
 আমার শ্যাম হলো যদি যোগী ওলো সখি  
 আমিও যোগিনী হব॥

সে আমারই ধৈয়ান করিত গো সদা  
 তার সে ধ্যান ভাঙিল যদি,  
 ওলো সে ভোলে ভুলুক, আমি ঐ রূপ  
 ধৈয়াইব নিরবধি।  
 আমিও যোগিনী হব!

শ্যাম যে তরুর মূলে বসিবে লো ধ্যানে  
 সেথা আঁচল বিছায়ে রবো।

আমি ধুলায় বসতে দেবো না সই,  
 তার সোনার অঙ্গ মলিন হবে  
 ধুলায় বসতে দেবো না সই।

কুয়াশায় চাঁদ পড়বে ঢাকা  
 সহিতে পারিব না সই।

সখি ধূলাই যদি সে মাগে,  
 আমি আপনি হইব রাঙা পথ-ধূলি  
 বঁধুয়ার অনুরাগে।

শ্যাম যে পথ দিয়ে চলে যাবে  
 সেই পথের ধূলি হব।

সে চলে যেতে দলে যাবে  
 সেই সুখে গো ধূলি হব।

হব ভিক্ষার ঝুলি, শ্যাম লবে তুলি  
 বাহুতে আমারে জড়ায়ে,

সখি আমার বেদনা-গৈরিক-রাঙা  
 বাস দেব তারে পরায়ে।

নবীন যোগীরে সাজাইব আমি,  
আমার প্রাণের গোখুলি-বেলার  
রঙে রঙে তারে সাজাইব আমি।

সখি তার অনাদর-আগুনে জ্বালায়ে  
পোড়াব লাবণি মোর,  
ওলো তারির হাতে আঘাতে আঘাতে  
হবে এ দেহ কঠোর।

আমার এ তনু শুকাবে গভীর অভিমানের জ্বালা,  
আমি তাই দিয়ে তার হব গলায় রুদ্রাক্ষেরই মালা।

আমি শ্যামের গলার মালা হব,  
আমি জীবনে পেয়েছি জ্বালা শুধু সখি,  
মরে এবার মালা হব।

আমার চোখের জলে বইবে নদী,  
আমি নদী হয়ে কেঁদে যাব  
চরণে তার নিরবধি।

আমি কি সুখে লো গৃহে রবো,

আমার শ্যাম হলো যদি যোগী ওলো সখি  
আমিও যোগিনী হব॥

BANGLADARSHAN.COM

২৬

জৌনপুরী-দাদরা

ফুল-কিশোরী! জাগো জাগো, নিশি ভোর।  
দুয়ারে দখিন-হাওয়া

খোলো খোলো পল্লব-দোর॥

জাগাইয়া ধীরে ধীরে  
যৌবন তনু-তীরে,

যাব চলি উদাসী কিশোর॥

চিনি গো দেবতা চিনি  
ও নূপুর-রিনিঝিনি,

ভেঙো না ভেঙো না ঘুম-ঘোর।

মধুমাসে আসো তুমি ফুলবাস-চোর।

প্রভাতে ফুটায় আঁখি

নিশীথে বহাবে আঁখি-লোর॥

BANGLADARSHAN.COM

ভৈরবী-ভূপাল-যৎ

জাগো জাগো, পোহাল রাতি।

গগন-আঙনে ম্লান চাঁদের বাতি।

পোহাল রাতি॥

মধুমাছি মধু বোলে,

ফুলমুখী ঘুম ভোলে,

শরমে নয়ন খোলে

শয়ন-সার্থী।

পোহাল রাতি॥

সলিল লুটায় ঘটে

বধূর বুকের তটে,

বাজে বাঁশি ছায়া-বটে

আবেশে মাতি।

পোহাল রাতি॥

২৮

কানাংড়া-কাহারবা-দাদরা

কে এল।

ডাকে চোখ গেল, ডাকে চোখ গেল,

ডাকে চোখ গেল॥

ওলো ও ডাকে কি ও

ঘুমের সতিনী ও,

ও যে চোখের বালি।

ঘুম ভাঙায় খালি।

সখি আঁখি মেলো।

মেলো আঁখি মেলো॥

BANGLADARSHAN.COM

কাজরি-কার্ফা

এলে কি শ্যামল পিয়া কাজল মেঘে।  
চাঁচর চিকুর ওড়ে পবন-বেগে॥

তোমার লাবণি ঝরে  
পড়িছে অবনী পরে,  
কদম শিহরে কর-পরশ লেগে॥

তড়িত ত্বরিত পায়ে  
বিরহী-আঁখির ছায়ে

তরাসে লুকায়।

ছুটিতে পথের মাঝে  
ঝুমুর ঝুমুর বাজে

ঘুমুর দুপায়।

অশনি হানার ছলে  
প্রিয়ারে ধরাও গলে,  
রাতের মুকল কাঁদে

কুসুমে জেগে॥

বাগেশী-কাওয়ালি

জনম জনম গেল আশা-পথ চাহি।  
মরু-মুসাফির চলি, পার নাহি নাহি॥  
বরষ পরে বরষ আসে যায় ফিরে,  
পিপাসা মিটায়ৈ চলি নয়নের নীরে।  
জ্বালিয়া আলেয়া-শিখা  
নিরাশার মরীচিকা  
ডাকে মরু-কাননিকা শত গীত গাহি॥  
এ মরু ছিল গো কবে সাগরের বারি,  
স্বপন হেরি গো তারি আজো মরুচারী।  
সেই সে সাগর-তলে  
যে তরী ডুবিল জলে  
সে তরী-সাথীরে খুঁজি মরু-পথ বাহি॥

ভৈরবী-দাদরা-কার্ফা (ফরতা)

কেন নিশি কাটালি অভিমানে।  
ডুবে গেল চাঁদ দূর বিমানে॥

মান-ভরে চাতকী এ বাদলে  
মিটালি না পিপাসা মেঘ-জলে।  
কোথা রবে এ-মেঘ কে বা জানে॥

রহে চাঁদ দূরে অমা নিশীথে,  
তবু ফোটে কুমুদী সরসীতে।  
রহে চাহি কলঙ্কী শশী পানে॥

যে ফাগুনে ফুল ফুটিল রাতে,  
রবে না সে ফাগুন কালি প্রাতে।  
যে ফুটিল না, সে শুকাবে বাগানে॥

৩২

খাম্বাজ-ঠুংরি

পেয়ে কেন নাহি পাই হৃদয়ে মম  
হে চির-সুদূর প্রিয়তম॥

তুমি আকাশের চাঁদ  
(আমি) পাতিয়া সরসী-ফাঁদ  
জনম জনম কাঁদি  
কুমুদীর সম।  
হে চির-সুদূর প্রিয়তম॥

(আমি) ফুলের কুলের রাধা,  
বৃন্তের কলে বাঁধা,  
চপল গগন-চারী

তুমি নিরমম।  
হে চির সুদূর প্রিয়তম॥

নিখিলের রূপে রূপে  
দেখা দাও চুপে চুপে,  
এলে না মুরতি ধরি  
ওগো নিরূপম।  
হে চির-সুদূর প্রিয়তম॥

৩৩

ভূপালী-আদ্বা কাওয়ালি

আসিলে কে অতিথি সাঁঝে  
পূজার ফুল ঝরে বন-মাঝে ॥

দেউল মুখরিত বন্দনা-গানে,  
আকাশ-আঁখি চাহে তব পানে।

দোলে ধরাতল

দীপ-বালমল,

নৌবতে ভূপালি বাজে ॥

BANGLADARSHAN.COM

ভৈরবী-কাওয়ালি

না মিটিতে সাধ মোর নিশি পোহায়।  
গভীর আঁধার ছেয়ে আজো হিয়ায়॥

আমার নয়ন ভরে  
এখনো শিশির ঝরে,  
এখনো বাহুর পরে  
বঁধু ঘুমায়॥

এখনো কবরী-মূলে  
কুসুম পড়েনি তুলে,  
এখনো পড়েনি খুলে  
মালা খোঁপায়॥

BANGLADARSHAN.COM

নিবাসে আমার বাতি  
পোহাল সবার রাত্তি;  
নিশি জেগে মালা গাঁথি,  
প্রাতে শুকায়॥

## ৩৫

গরজ-একতালা

পরজনমে দেখা হবে প্রিয়।  
ভুলিও মোরে হেথা ভুলিও॥

এ জনমে যাহা বলা হলো না,  
আমি বলিব না, তুমিও বলো না।  
জানাইলে প্রেম করিও ছলনা,  
যদি আসি ফিরে, বেদনা দিও॥

হেথায় নিমেষে স্বপন ফুরায়,  
রাতের কুসুম প্রাতে ঝরে যায়,  
ভালো না বাসিতে হৃদয় শুকায়,  
বিষ জ্বালা-ভরা হেথা অমিয়॥

হেথা হিয়া ওঠে বিরহে আকুলি,  
মিলনে হারাই দু দিনেতে ভুলি,  
হৃদয় যথায় প্রেম না শুকায়,  
সেই অমরায় মোরে স্মরিও॥

BANGLADARSHAN.COM

৩৬

ছায়ানট-দাদরা

বনে বনে দোলা লাগে।

মনে মনে দোলা লাগে।

দখিনা-সমীর জাগে ॥

এ কি এ বেদনা লয়ে

ফুটিল ফুল হৃদয়ে,

গোপনে মধুর ভয়ে

না-জানা পরশ মাগে ॥

অশোক রঙিন ফুটে

কিশোর হৃদয়পুটে,

কপোল রাঙিয়া উঠে

অতনুর অনুরাগে ॥

BANGLADARSHAN.COM

ভৈরবী-কার্ফা

কে ডাকিল আমারে আঁখি তুলে,  
এই প্রভাতে তটিনী-কূলে কূলে॥

ঐ ঘুমায়ে সকলি, জাগেনি কেউ,  
জল নিতে আসেনি এখনো বউ,  
শুধু তব নদীতে জেগেছে ঢেউ,  
মেলেছে নয়ন কানন-ফুলে॥

যে সুবাস ঝরে ও এলোকেশে  
কমলে তা দিতে নাহিতে এসে,-  
তব তনু-বাস দিঘিতে ভেসে-  
মাতাইছে, মধুপ পথ ভুলে॥

ও শিশির কপোল-স্বেদ-বারি  
পড়িল বারি নয়নে আমারি,  
জাগিয়া হেরি রূপ মনোহারী  
দাঁড়িয়ে উষসী তোরণ-মূলে॥

৩৮

মেঘ রাগ-ত্রিতালী (দ্রুতগতি)

ঘেরিয়া গগন মেঘ আসে।

বিহ্বল ধরণী,

দশ দিশি কাঁপে তরাসে॥

বিদ্যুৎ বালকে

ঝামর অলকে

ঝামঝাম ঝাঝর

বাজে ঘন আকাশে॥

শিখী নাচে হরষে

বারিধারা বরষে,

চাতক চাতকী

পাগল পিয়াসে॥

BANGLADARSHAN.COM

হিন্দোল-গীতঙ্গী

দুলে চরাচর হিন্দোল-দোলে।

বিশ্বরমা দোলে বিশ্বপতি কোলে॥

গগনে রবি শশী গ্রহ তারা দুলে,

তড়িত-দোলনাতে মেঘ ঝুলন ঝুলে।

বরিষা-শতনোরি

দুলিছে মরি মরি,

দুলে বাদল-পরী

কেতকী-বেণী খোলে॥

নদী-মেঘলা দোলে, দোলে নটিনী ধরা,

দুলে আলোক নভ-চন্দ্রাতপ ভরা।

করিয়া জড়াজড়ি দোলে দিবস নিশা,

দোলে বিরহ-বারি, দোলে মিলন-তৃষা।

উমারে লয়ে বুকু

শিব দুলিছে সুখে,

দোলে অপরূপ

রূপ-লহর তোলে॥

হিন্দোল-সাদ্রা

হিন্দোলি হিন্দোলি

ওঠে নীল সিন্ধু।

গগনে উঠিল তার

কোন পূর্ণ ইন্দু ॥

শত শুক্ৰি-আঁখি দিয়া

পিইছে চাঁদ অমিয়া,

শিশির রূপে ঝরিয়া

পড়ে জ্যোৎস্না-বিন্দু ॥

(ভজন) ভৈরবী-দাদরা

ওগো সুন্দর আমার!  
সুন্দর আমার, এ কি দিলে উপহার॥

আমি দিনু পূজা-ফুল,  
বর দিতে দিলে ভুল,  
ভাঙিল আমার কুল,  
তব স্নোতধারা॥

গরল দিলে যে এই  
অমৃত আমার সেই,  
শুকাল নিশি-শেষেই  
রাতের নীহার॥

তোমারি সুখ-হোঁওয়ায়  
ফুটেছে ফুল শাখায়,  
তোমারি উতল বায়  
ঝরিল আবার॥

BANGLADARSHAN.COM

টোরি-যৎ

জাগো জাগো, খোলো গো আঁখি।  
নিকুঞ্জ-ভবনে তব জাগিল পাখি।  
খোলো গো আঁখি॥

তোমার রাতের ঘুমে  
রবির কিরণ চুমে,  
বাঁধিল কানন-ভূমে  
ফুলের রাখি।  
খোলো গো আঁখি॥

স্বপনে হেরিছ যারে  
সে এল পূর্ব দ্বারে,  
বাতায়ন খুলি তারে  
লহ গো ডাকি।  
খোলো গো আঁখি॥

# ৪৩

আড়ানা-যৎ

বাজায়ে জল-চুড়ি কিঙ্কিনী,  
কে চলো জল-পথে উদাসিনী ॥

পথিকে ডেকে বলো  
'ছল গো ছলছল'  
ছুঁতে উছলে জল  
গরবিনী ॥

তোমার কোল মাগি  
কূলের হতভাগী  
রহে ও কূলে জাগি  
নিশীথিনী ॥

বুকেতে বহে তরী  
চাহ না জল-পরী  
চল সাগরে স্মরি  
পূজারিণী ॥

BANGLADARSHAN.COM

মাঢ়-কাওয়ালি

পরদেশী বঁধু! ঘুম ভাঙায়ো চুমি আঁখি।  
যদি গো নিশীথ জেগে ঘুমাইয়া থাকি।  
ঘুম ভাঙায়ো চুমি আঁখি॥

যদি দীপ নেভে গো কুটিরে,  
বাতায়ন-পানে চাহি যেয়ো না গো ফিরে,  
নিবেছে আঁখির শিখা প্রাণ আছে বাকি।  
ঘুম ভাঙায়ো চুমি আঁখি॥

যদি গান থামে মোর মুখে,  
ফিরিয়া যেয়ো না, বীণা রবে তবু বুকু,  
নাহি গান, কুলায়েতে আছে তবু পাখি।

ঘুম ভাঙায়ো চুমি আঁখি॥

## ৪৫

মল্লার-কাওয়ালি

ঝরিছে অবোর বরষার বারি।  
গগন সঘন ঘোর,  
পবন বহিছে জোর,  
একাকী কুটিরে মোর  
রহিতে নারি॥

শিয়রে নিবেছে বাতি,  
অন্ধ তমসা রাতি,  
গরজে আওয়াজ বাজ  
গগন-চারী॥

চমকিছে চপলা,  
জাগি ভয়-বিভলা  
একা কুমারী॥

BANGLADARSHAN.COM

## ৪৬

পুরীয়া-ত্রিতালী

চলো সখি জল নিতে

চল তুরিতে।

শ্রান্ত দিনের রবি

ডোবে সরিতে॥

ঘিরিছে আঁধার

তটিনী-কিনার,

গোধূলির ছায়া পড়ে

বন-হরিতে॥

ধেনু-ডাকা বেণু বাজে

বংশী-বটে,

পাখি ওড়ে, আঁকা যেন

আকাশ-পটে।

বধু ঘাটে যায়,

বঁধু পথে চায়,

চিনি চিনি বাজে চুড়ি

গাগরীতে॥

BANGLADARSHAN.COM

## ৪৭

মুলতান-একতালি

কার বাঁশরি বাজে মুলতান-সুরে  
নদী-কিনারে কে জানে।  
সে জানে না কোথা সে সুরে  
ঝরে ঝর-নির্ঝর পাষাণে॥

একে চৈতালি-সাঁঝ অলস  
তাহে ঢলঢল কাঁচা বয়স  
রহে চাহিয়া, ভাসে কলস,  
ভাসে হৃদি বাঁশুরিয়া পানে॥

বেণী বাঁধিতে বসি অঙ্গনে  
বধু কাঁদে গো বাঁশরী-স্বনে।

যারে হারায়েছে হেলা-ভরে  
তারে ও-সুরে মনে পড়ে,  
বেদনা বুকে গুমরি মরে  
নয়ন ঝুরে, বাধা না মানে॥

BANGLADARSHAN.COM

## ৪৮

পাহাড়ি মিশ্র-কাহারবা

মোর ধৈয়ানে মোর স্বপনে

পরান-প্রিয়, দিও হে দেখা!

মোর শয়নে মোর নয়নে

লিখিয়া যেয়ো সলিললেখা॥

পথ চলিতে আসিলে ভুলে

নিও না তুলে তব দেউলে,

হবে না পূজা এ বন-ফুলে,

দেবতা মম, ঝরিব একা॥

BANGLADARSHAN.COM

ধবলশ্রী-মধ্যমান

নাইয়া, করো পার!

কূল নাহি, নদী-জল সাঁতার ॥

দুকূল ছাপিয়া জোয়ার আসে

নামিছে আঁধার, মরি তরাসে

দাও দাও কূল কূলবধু ভাসে

নীর পাথার।

নাইয়া, করো পার ॥

মধুমাত সারং-কাওয়ালি

মাধবী-তলে চলো      মাধবিকা-দল  
আইল সুখ-মধুমাস।  
বহিছে খরতর      থরথর মরমর  
উদাস চৈতী-বাতাস ॥

পিককুল কলকল অবিরল ভাষে,  
মদালস মধুপ পুষ্পসুবাসে।  
বেগু-বনে উঠিছে নিশ্বাস ॥

তরণ নয়ন সম আকাশ আনীল,  
তট-তরণছায়া ধরে নীর নিরাবিল,  
বুকে বুকে স্বপন-বিলাস ॥

BANGLADARSHAN.COM

৫১

বৃন্দাবনী সারং-কাওয়ালি

বৃন্দাবনে এ কি বাঁশরি বাজে।  
গোপিনী উন্মুনা, মন নাহি কাজে॥

কুলবধু-ঘটে ঘটে সে বাঁশি স্বনে  
উছলি উছলি ওঠে নীর ক্ষণে ক্ষণে।

নয়ন-সলিল বারে গাগরি-মাঝে॥

BANGLADARSHAN.COM

নিশীথ নিশীথ জাগি গৌয়ানু রাতি।  
জুলিয়া জুলিয়া নেভে শিয়রের বাতি॥

সারা দিন গাঁথি মালা তুলিয়া কুসুম,  
পথ চাহি চাহি কবে চোখে আসে ঘুম,  
রহে পড়ি নব শেজ, কুসুমের পাঁতি॥

আমার কাননে আসি অলি যয়ি ফিরে,  
গাহি গান ফেরে সাঁঝে পাখি সব নীড়ে।  
একেলা রহি গো শুধু আমি বিনা সাথী॥

৫৩

নাগধ্বনি কানাড়া-মধ্যমান

দেখা দাও, দাও দেখা, ওগো দেবতা।  
মন্দিরে পূজারিণী আশাহতা ॥

ধূপ পুড়িয়া গেছে, শুকায়েছে মালা,  
বন্ধ হলো বা দ্বার, একা কুলবালা।  
প্রভাতে জাগিবে সবে, রটিবে বারতা ॥

জাগো জাগো দেবতা শূন্য দেউলে,  
আরতি উঠিছে মোর বেদনার ফুলে।  
বাণীহীন মন্দির, কহ কহ কথা ॥

BANGLADARSHAN.COM

॥সমাপ্ত॥